

nommerent *Cerealia*, du nom de Cerés, laquelle ils dirent Deesse des bleds) seruans à la nourriture du corps humain : dont furent nommez Cereales: outre laquelle charge, ils auoyent aussi le regard sur les poids & mesures, afin qu'il ne s'y fist fraude ou faulseté.

Questeur.

Questeur estoit comme Thresorier ou Receueur de la pecune publique prouenant des rentes, reuenus, tailles & subides, amendes, & autres proffits : qui se mettoit au thresor public, nommé *Aerarium*, duquel auons parlé cy deuant. Quand le Consul, Proconsul, ou Preteur alloient à la guerre, ils menoyent le Questeur avec eux, pour receuoir l'argent des despouilles des ennemis, vendues par leur commandement. Et tels sont aujourd'hui nommez Thresoriers des guerres : à la difference de ceux qui demeuroient à la ville, ayans soin du thresor public dont ils auoyent à rendre compte. Il y auoit aussi d'autres Questeurs à Rome, c'est à dire, Inquisiteurs touchant les malefices, qui faisoient les enquestes en matieres criminelles, comme iuges ordonnez pour les malefices & crimes, en la sorte des Triumuir capitaux, desquels auons parlé au chap. 3. L'office de Questeur fut mis en auant par Tullus Hostilius, troisieme Roy des Romains.

Duumuir.

Duumuir estoient deux hommes esleuz, quelquefois pour mettre à ferme les tributs de quelques villes, pour mener & establir des Colonies, & designer lieux pour habiter & demeurer. Autres Duumuir auoyent la charge & garde des prisons à Rome : autres Duumuir auoyent la commission de faire ou raccoustrer des nauires : autres Duumuir estoient pour le fait de la religion, aussi bien que les Quindecimuir, qui estoient quinze hommes, deleguez pour le mystere des sacrifices, nommez des Latins *Quindecimuir sacrorum faciendorum*. *Septemuir epulonum* estoient aussi quant au fait de la religion, sept hommes ordonnez pour preparer viures & banquets à Iupiter, & aux autres idoles: comme fut Cestius, ainsi qu'appert par sa medalle que nous auons. A cest office de faire les banquets aux Idoles, n'estoient que trois hommes commis, dits *Triumuir epulonum* : mais depuis vindrent iusques au nombre de sept. S. Augustin au liure de la Cité de Dieu, dit que deuant la statue de Iupiter y auoit vne table d'or tousiours chargée de viandes, & bordée de mangeurs & bueurs. Cela sentoit mieux son cabaret que son temple.

Triumuir.

Triumuir estoient trois hommes, commis à la charge de diuers offices : car, comme a esté dit au 3. chapitre, aucuns Triumuir estoient monetaires, c'est à dire, auoyent la charge de faire battre les